



湖廣通志

雜紀

百二十

內閣文庫		
番號	漢	14208
冊數	100(100)	
函號	史	130 1





通志卷之一百二十

雜紀

楚人物世說新語王中郎坦之令伏元度滔習鑿齒論  
青楚人物滔集載其畧曰鑿齒以神農生於黔中名南  
詠其美化春秋稱其多才漢廣之風不同鷄鳴之篇于  
文叔敖羞與管晏比德接輿之歌鳳兮漁父之詠滄浪  
漢陰丈人之折子貢市南宜僚屠羊說之不爲利回魯  
仲連不及老萊夫妻田光之於屈原鄧禹卓茂無敵於  
天下管幼安不勝龐公龐士元不推華子魚何鄧二尚  
書獨步於魏朝樂令無對於晉世昔伏羲葬南郡少昊  
葬長沙舜葬零陵比其人則準的如此論其地則羣聖

之所葬考其風則詩人之所歌尋其事則未有赤眉黃巾之賊此何如青州耶

介子推說苑子推行年十五而相荆仲尼使人往視還曰廊下有二十五俊士堂上有二十五老人仲尼曰合二十五人之智智於湯武並二十五人之力力於賁育以治天下與國克矣况荆乎

王業者舊傳字子香漢和帝時為荊州刺史每出行都沐浴齋素以祈於天地當啟佐愚心無使有枉百姓在州七年惠風大行苛慝不作山無豺狼天子徵之道卒於枝江有二白虎低頭曳尾宿衛其側及喪去州境忽然不見百姓共為立碑號曰枝江白虎王君

劉勤謝承後漢書江夏劉勤家貧作屨供食嘗作一量屨斷勤置不賣出行妻賣以糴米勤歸炊熟怪問何所得米妻以實告勤責妻曰賣毀物欺取其直也因棄不食仕至司徒

蔣琬湘鄉人蜀志蔣琬見推之後夜夢有一牛頭在門前流血滂沱意甚惡之呼問占夢趙直直曰見血者事分明也牛角及鼻公字之象君位必當至公大吉之徵也

谷利江表傳利本孫權左右給使以謹直為親近監尋拜利都亭侯孫權於武昌新裝大船名為長安試泛之鈞臺沂時風大盛利令拖上取樊口權曰當張頭取羅

州利拔刀向拖工曰不取樊口者斬工即轉拖入樊口風遂猛不可行乃還權曰阿利畏水何怯也利跪曰大王萬乘之主輕於不測之淵戲於猛浪之中樓船裝高邂逅顛危奈社稷何是以利輒敢以死爭權於是貴重之不復稱名常呼曰谷

陶侃晉書侃在武昌與佐吏從容飲燕每有定限常歡有餘而限已竭殷浩等勸更少進侃悽懷良久曰年少曾有酒失亡親見約故不敢踰

羅含晉書羅含傳耒陽人幼孤為叔母朱氏所養少有志尚嘗晝臥夢一鳥文采異常飛入口中因起驚說之朱氏曰鳥有文彩汝後必為大官自此藻思日新稱名

江左累遷長沙相初在官舍有一白雀棲集堂宇及致仕還家階庭忽蘭菊叢生以為德行之感焉

韓延之安帝時為荊州治中轉平西府錄事叅軍以劉

裕父名翹字顯宗延之遂字顯宗名兒為翹以示不臣

劉氏與司馬休之俱奔姚興劉裕入關又奔於魏荆州志

劉季和襄陽記季和性愛香常如廁還過香爐上主簿


張坦日人名公作俗人不虛也季和曰荀令君至人家

坐處三日香為如何坦曰醜婦效顰見者必走公欲我

退走耶

裴子野為江夏王叅軍遭父憂去職居喪盡禮每至墓

所哭泣處草為之枯有白兔馴擾其側舊志



張僧繇名畫記梁張僧繇吳人也江陵天皇寺明帝置  
內有柏堂僧繇畫盧舍那佛像及仲尼十哲帝怪問釋  
門內如何畫孔聖僧繇曰後當賴此耳及後周滅佛法  
焚天下寺塔獨此殿有宣尼像乃不毀拆

閻立本隋唐嘉話立本善畫至荊州見張僧繇舊蹟曰  
定虛得名耳明日又往日猶近代佳手明日又往日各  
下定無虛士坐臥觀之畱宿其下十日不能去

牛僧孺幽閑鼓吹丞相牛公應舉知于頔相之奇俊也  
特詣襄陽求知頔以海客遇之牛公怒而去後忽召客  
將問曰累日前有牛秀才發未曰已去何以贈之曰與  
之五百受之乎曰擲之於庭而去于公大憾謂賓佐曰

某蓋事繁有闕違者立命小將賫絹五百書一函追之  
小將於界外追及牛公不啟封揖還

葛清酉陽雜俎荊州街子葛清勇不膚撓自頸以下遍  
刺白居易舍人詩成式嘗與荊客陳至呼觀之令其白  
解背上亦能闇記反手指其去處至不是此花偏愛菊  
則有一人持盃臨菊藜又黃夾纈林寒有葉則指一樹  
樹上挂纈纈窠纈勝絕細凡刻三十餘處首體無完膚  
陳至呼爲白舍人行詩圖也

于襄陽酉陽雜俎于襄陽在鍾時選劉某入京逢一舉  
人年二十許言語明悟同行數里意甚相得因藉草劉  
有酒傾數盃日暮舉人指支逕曰某敝舍從此數里能

左顧乎劉辭以程期舉人因賦詩流水涓涓芹芻牙織  
鳥雙飛各還家荒村無人作寒食殯宮空對棠梨花比  
明至襄州尋訪舉人殯宮存焉

邢和璞西陽雜俎邢得黃老之道善心算作潁陽書疏  
有叩奇旋入空或言有草初未嘗睹成式見山人鄭訪  
說崔司馬者寄居荊州與邢有舊崔病積年且死心常  
恃於邢崔一日覺臥室北墻有人斲聲命左右視之都  
無所見臥室之北家人所居也如此七日斲不已墻忽  
透明如一栗問左右復不見經一日穴大如盤崔窺之  
墻外乃野外耳有數人荷鋏鑿立於穴前崔問之皆云  
邢真人處分開此司馬厄重倍費工力有頃導騶五六

悉平幘朱衣辟曰真人至見邢輿中白帽垂綬執五明  
扇侍衛數十去穴數步而止謂崔曰公算盡僕爲公再  
三論得延一紀自此無苦也言畢壁如舊旬日病愈  
馬希範荆湖近事希範作九龍殿刻沉香爲八龍飾以  
金寶長十餘丈抱柱相向作趨捧勢而已坐其間自謂  
一龍也其幘頭展角長丈餘以象龍角諸院王子僕從  
炬赫文武之道未嘗留意時謂之酒囊飯袋  
周行逢續世說周鎮西土湖湘兵將積功檢校官至王  
公者以千數行逢生日諸道各遣使致賀行逢有矜色  
謂徐仲雅曰四隣乃亦畏我乎對曰侍中境內彌天太  
保徧地司空四隣那得不畏

李載仁三楚新錄載仁唐之後也避亂於江陵高季興署觀察推官載仁自負文學嘗爲季興見知然爲性迂緩一日將赴高從誨召方上馬無何部曲相毆載仁怒命急於厨中取飯並猪肉令相毆者對食之仍戒曰如敢再犯必當於猪肉中加之酥聞者無不笑之

孫光憲三楚新錄成都人高從誨辟爲掌書記嘗慕史氏之作自恨諸侯幕府不足展其才力謂交親曰安知獲麟之筆反爲倚馬之用因吟劉禹錫詩曰一生不得文章力百口空爲飽煖家

渚宮二疏宋史咸平初朱昂以工部侍郎懇求歸江陵逾年方允舊制致仕官止謝殿門外昂特延見命坐恩禮甚厚令俟秋涼上道遣中使賜宴於玉津園兩制三館皆預仍詔賦詩餞行縉紳榮之時吳淑贈行詩有漢殿夜涼初閣筆渚宮秋晚得懸車之句弟協亦同隱皆享眉壽家林相接謂之渚宮二疏知府陳堯咨署其居曰東西致仕坊景德四年卒年八十三門人謚曰正裕先生

二宋厚德錄宋庠宋祁應山人少時有僧相曰小宋他日魁天下大宋亦不失甲科後十年僧驚問大宋日子丰神頓異如曾活數萬命者庠曰貧儒何力及此僧曰不然肖翹之物皆命也庠俛思良久乃笑而言曰旬日前所居堂下有蟻穴爲暴雨所侵吾編竹橋渡之耳僧



日昃也小宋固當首捷子恐不出其下二宋私語曰妄  
一歲豈有兩魁乎明年二宋同舉進士及第祁第一庠  
第十章憲太后不欲以弟先兄乃擢庠第一而寧祁第  
十後人立渡曦橋識之

宋相郊郊居政府上元夜在書院讀周易其弟學士祁  
點華燈擁歌妓醉飲達旦翊日諭所親令誚讓云相公  
寄語學士聞昨夜燒燈夜燕窮極奢侈不知記得某年  
上元同在某州州學內喫蠶煮飯食否學士笑曰却須  
寄語相公不知某年同某處喫蠶煮飯是為甚底舊志

南宮城湘山野錄馮文簡當世始求薦於武昌會小宗  
者庸謬寡鑒堅欲出落又欲置於末綴時鄂倅南宮城

監試當拆封定卷大不平奮臂力爭之以馮冠於鄉版  
果燬火魁釋褐除荆南倅

歐陽程初名和營道人少貧兄澤為郡吏依之傭書賦  
池亭詩云鑿開幽境泛流萍迴合波間小洞庭寒影倒  
吞凌漢樹冷光高浴半天星魚翻錦鬣波紋皺鷺洗霜  
翎水氣腥昨夜蛟龍忽飛去滿軒風雨震雷霆郡守知  
為和作乃召和試之指架上鶯為題和應聲即對有不  
知誰是解縉人之句守異之曰吾為汝解縉何如遂給  
俸金遣和充學官弟子赴試路間逢一青衣童子云以  
今科省榜走報各處城隍因問道州歐陽和中否應曰  
有歐陽程無和和因更名程是年登王世則榜進士時

太平興國八年也仕至屯田員外郎 道州志

王韶東軒筆錄韶罷副樞知鄂州宴客出家妓坐客張績醉挽妓不前將擁之妓泣訴於韶坐客皆失色韶曰出爾曹以娛賓乃令客失歡命取大杯罰妓人服其量寇忠愍準登第授大理評事知歸州巴東縣唐謂方為邵夕夢有人告云宰相至唐思之不聞朝廷有宰相出鎮者晨興視事而疆吏報寇入界唐驚出郊迓勞見其風神秀偉便以公輔待之且出諸子羅拜在縣日人皆以寇巴東呼之有野水無人渡孤舟盡日橫之句時以為若得用必濟大川初準赴巴東舟經查渡灘水急難上俄聞水中人語準視之有人裸體為挽舟準詰之答

曰我黃魔神也公異日當大用故來護但裸體不敢見準以錦袱投之神即以袱蔽體而出國老談苑準謫營道唯衣裘繫為相時所得金笏頭帶當權希時者諷其逾禮準拒之曰君父所賜服之不忘未見禮之失也諷者慙而退

岳武穆飛領兵過茶陵鄉人尹彥德以牛酒謁軍門犒軍三日飛曰汝當以詩書教其子孫乃親書一經堂三大字遺之彥德如其言子伯正仲正後果登第飛初封武昌縣開國子後子霖漕湖北過武昌吏民設香案具酒牢哭而迎有一媪尤哀曰相公今不復此來矣霖呼而遺之食問其夫何在媪哭曰不善為人為相公所斬

矣問其子與婿皆然人以此知武穆之感人者深矣舊志

李南公天中記尚書李南公知長沙縣日有鬪者甲強乙弱各有青赤傷南公召使前自以指捏之曰乙真甲偽也訊之果然蓋南方有樺柳以葉塗肌則青赤如毆傷者剝其皮橫置膚上以火熨之則如棒傷水洗不下但毆傷者血聚則硬偽者不硬耳有一村多豪戶稅不可督所差戶長輒逃去南公曰然則此村無用戶長知縣自督之書其村名帖於柱豪右皆懼是歲初限未滿此村稅最先集又諸村多詭名村存戶亡每歲戶長代納亦不可差南公悉召其村豪右謂之曰此田不過汝

曹所典賣耳與汝期一月爲我推寃不則汝曹均分趣之及期盡得冒稅之人使各承其稅

夏英公夏竦鎮襄陽遇肆赦各賜帛時胡旦嘗廢在州竦依赦送胡謙十疋胡笑曰傳與舍人何寡聞如此奉還五疋請檢韓詩外傳及服虔諸儒所解束帛芟芟之義竦檢之果見三代束帛束脩之制束脩得十脰卽脯一束束帛則卷爲二端五疋表王者有屈折於隱淪之道也襄陽府志

丁晉公國老談苑丁謂既竄朱崖路由湘潭佛寺飯僧爲文以自敘其畧曰補仲山之袞雖曲盡於片心和傳說之羹實難調於衆口

解潛紹興元年鎮撫使知荆南府解潛奏措置荆南歸  
陝荆門公安五州營田其後軍食仰給省縣之半荆州志  
陳規建炎末德安復州漢陽軍鎮撫使陳規倣古屯田  
有逃戶歸業者收畢給之過三年者不受理凡軍士所  
屯之田皆相其險隘立爲堡塞其弓兵等半爲守禦半  
爲耕種如遇農時則就田作有警則充軍用舊志  
張闡諍隆興元年工部尚書張闡言今日荆襄屯田之  
害非田之不可耕也無耕田之民也官司慮其功之不  
就不免課之游民游民不足不免抑勒百姓捨已熟田  
耕官生田私田旣荒賦稅猶在或遠數百里追奪以來  
或民雙丁役其強壯占百姓之田以爲官田奪民種之

穀以爲官穀老稚無養一方騷然有司知其不便申言  
於朝罷之誠是也然臣切謂自去歲以來置耕牛置農  
器修長木二渠費已十餘萬其間豈無已墾闢之地豈  
無廬舍場圃尚可卒業一旦舉而棄之不爲勢家所占  
則是捐十萬緡於無用之地而荆襄之田終不可耕也  
臣比見兩淮歸正之民動以萬計官給之食以半歲爲  
期今踰期矣官不能給則老弱饑者轉而他之殊失斯  
民向化之心兼亦有傷國體臣愚以爲荆襄之田尚亦  
有可承之規與其棄之孰若使歸正之民就耕非惟可  
免流離庶使中原之民知朝廷有以處我率皆襁負而  
至異日墾闢旣廣田疇旣成然後取其餘者而輸之官

實爲兩便襄陽志

謝諫議謝泌居官不妄薦士或得一人則焚香捧表望關再拜而遣置所薦雖少無不顯者咸平間泌知襄州日張逸知鄧城以暇日多乘小車從數吏渡漢水入鄧城界以觀風謠或載酒邀張吟嘯終日而去其高逸樂善如此張亦其薦也襄陽志

張詠國老談苑詠鎮永興有父老訴牛舌爲人所割詠詰之爾於鄉什誰氏最隙訴者曰有甲氏嘗貸粟於某家不遂搆怨之深詠遽遣去戒云至家徑解其牛貸之父老如教翌日有百姓訴殺牛者詠謂之曰爾割某氏牛舌以償貸粟之怨而反致訟耶其人遂伏罪

李西樞宋敏求退朝錄憲成爲知制誥尚衣緋出守荆南召爲學士閣門舉例賜金帶而不可加於緋衣乃並賜三品服

王立天聖初爲夔州路轉運使施州徼外蠻利得賜物每歲求入貢者甚衆所過煩擾爲公私患立奏令以貢物輸施州遣還溪洞又城施州通雲安軍道以運鹽朝廷嘉之舊志

邊鎬南唐書鎬不知何許人事烈祖累遷通事舍人保大初率洪州屯兵尅建泉汀漳等州八年馬希萼入潭州命鎬以州兵如界上覘楚遂討長沙破其軍於龍回關希萼希崇相繼送款鎬盡遷馬氏之族歸於金陵以

功拜湖南節度使錡性柔懦御下無法初平建州民所  
尅獲惟以全活爲務閩人德之號邊羅漢及尅湘潭市  
不易肆楚人益喜號邊菩薩旣而政出多門荏苒無斷  
惟事僧佛人皆失望遂號爲邊和尚

羅狀元宣和間平江羅孝芬居側有大柿樹雷折之火  
燎其文成羅狀元字下有三點人莫能測明年孝芬舉  
甲科第三始悟其兆 岳州志

辛中丞辛次膺紹興中爲湖南提刑舟至武昌大將岳  
侯於江亭迎謁辛見之卽以明日具食旣宴延辛入小  
閣執手曰前夕夢爲棘寺逮對獄獄吏曰辛中丞被旨  
推勘驚寤而津吏報君至他日飛或不幸下獄願公故

護之後數年飛故部王貴迎時相意告其謀叛繫大理  
獄新除御史中丞何鑄治其事方悟前夢乃新中丞也

江夏志

張拱之江陵人政和中夢白衣人拜於床下旋入於池  
命僕掘其處得大銀二十錠一一花書之藏諸篋笥他  
日復夢來別云欲往長沙助趙官人造宅旦發笥果空  
矣遂往長沙訪之善化縣旁有趙宅方興工創大第張  
乃謁之謂趙曰君家治地時於土中獲何物趙云得白  
金千兩張乃話前夢以他銀相易攜歸寘於床足入夜  
常聞泣聲後不知所之 荊州志

楊大方 夷堅志大方岳州人好學負氣紹熙中赴漕臺

試於江陵道中過一廟衣冠入謁擲案間盃玆咨決得失神不許時已被酒遂取玆毀之控惡部判官鬚大聲叱責引足蹴仆之乃去纔出門闕蹶移時起謂僕曰酒之累人如此吾適入廟實爲過侮被二卒追詣庭下神詰責甚峻賴善部力爲分解曰此子爲一醉所誤未宜寘之重罰就令充惡部使神首肯我必不免索紙作家書授僕投筆而逝

王翊東坡志林岐亭有王翊者家富而好善夢於水邊見一人爲人所毆傷翊救之得免明日偶至水邊見一鹿爲獵人所得翊悟以數千贖之鹿隨翊起居未嘗一步捨又翊所居後有茂林果木一日有村婦過林中覓

一桃熟而絕大獨在木杪乃取而食之翊適見大驚婦人食已棄其核翊取而剖之得硫黃一塊如桃仁吞之甚甘美自是斷葷肉齋居一室


滑世昌鄂州都統司醫官居於南草市家貲積萬會歲荒疫自捐錢藥救療淳熙中夢客來訪車從甚都云此邦明日有非常災君家亦當墮此厄君平日多所濟活神特救之其妻夢亦如此至日大風夜半火作滑居灰燼忽有壯夫數十輩著紫衫執簷十乘烈火邊驅家人登之昇至野逕俄風雪大作人籥不見一家皆存又於爐中得三十餘金遂免凍餒舊志

高宰荆南有妖巫挾幻術禍福人郡縣莫敢問吳興高

某爲江陵宰欲杖之大吏泣諫恐罹奇禍高愈怒卒杖之巫嬉笑而出頃之高面漸浮滿遽詢巫所居巫出迎高命縛之柱亂筆之凡神像經文悉焚之搜得小筍茵裏木人又碎之巫無完膚高面漸平執之還白於大吏曰某不惜一身爲邦人除害矣大吏命投之江荆州志永興倅桐陰舊話職方諱釋字仲連從晏元獻公辟爲永興倅有富家子悅媚女柳約爲夫婦而父母強爲子娶乃謀之市卜教以厭蠱期妻必死旣而妻果病垂死妻之父母聞而告官晏公醇儒不信曰世顧有是耶職方固請鞠之遂得實發地藏木偶人書其妻名氏生時與呪詛之辭晏公大驚乃奏抵法

德安總轄宋龐元英談藪德安有人家土庫中被盜者絕無踪跡一總轄謂其徒曰恐是市上弄糊繇者試往脅之不伏則執之又伏則令唾掌中如其言其人良久覺無唾可吐色變具伏乃令狗窺中入取物或謂總轄何以知之曰吾亦不敢必但人之驚懼者必無唾可吐姑以卜之幸而中耳

毛憲憲守長沙謝韓平原云湖南之地二千里序詩李託於昌黎平原之客十九人脫穎願同於毛遂舊志劉次卿荆楚歲時記江夏劉次卿以正旦至市見一書生入市衆鬼悉避劉問書生日子有何術以至於此書生言我本無術出之日家師以一丸藥絳囊裹之令以





繫臂防惡氣耳於是劉就書生借此藥至所見鬼處諸  
鬼悉走其方用武都雄黃丹散二兩蠟和令調如彈丸  
正月旦令男左女右帶之

樊尚璟段然記江夏令樊尚璟諸生時夢神人赭袍異  
相語之曰吾洞庭水神也君異時成進士必收余土後  
筮仕江夏值邑人肇建柳毅廟因割金以助入廟瞻拜  
神像宛如夢對或云神語終身事甚悉秘而不宣

汪安行安行以武陵郡丞攝守澧陽移攝巴陵歸任道  
由安鄉阻風五日禱於黃山祠夢烏巾紫襪者來謁云  
詰朝可行矣異日吾邦使君也敢不告既寤風果息解  
維去秩滿還朝遂得澧守紹興改元乃書其事於廟

州志

黃可久嘗避暑黃鶴樓夜臥初醒江月照樓中見兩道  
人奕一道人旁觀碁子大如碌樓空子落其聲碎碎然  
私念夜來登樓時守者已鎖門去道人何自入且狀貌  
殊異急起披衣就之將近遠不見又嘗夜渡陽邏風起  
舟覆身沉至底一黑丈夫長及天以手托之置覆舟底  
土先有漁者夢冠袍人從鏡匣中起伺之江干見可久  
坐風浪中拏舟救之

舊志

蘄謝童子相傳宋時人少選悞十歲不能言父母怪之  
多苦焉令牧牛一日作牧牛謠云可若何遠遠騎牛下  
淺坡長笛一聲鳴也清歌一曲無多後遂能言神益清

朗並能書與詩然不傳所傳者僅此 舊志

江陵姚子姚為母以燒死終身不忍瞰炙 荊州志

廬山子述異記益陽曾欽掄家小廬山下遂號廬山子

為人嚴毅正直樂善好施既歿之八年其子德泗病篤

一日忽強起衣冠出大門揖云大人幸臨入門作拴馬

狀升堂設上座呼家人羅拜設酒食聽泗問答隱隱若

欽掄對語等云大人賜我藥取碗注水作調和狀飲訖

碎碗於地藥氣達於戶牖日暮送出大門深揖別還就

寢氣絕移時乃甦云大人示我某日愈果驗里中傳以

為奇

蔣彬黃梅人生五歲不言一日有戲是兒癡者忽應聲

曰如君喋喋不如我默默一座皆驚 舊通志

胡繼宗廣濟人有版數十間貯穀每歲不登設食待遠

糶者而貸其息錢忽版內一黃物似蛇鱗角四足長數

尺以穀為窠其家祭之日餉一粥土人呼為穀龍又阮

思槐竭困賑饑後飛粟來集倉皆滿 舊通志

周應嵩麻城進士性喜施予父歿以所易田產還其主

者無算一日置數十金於篋為同塾友盜去家僮私啟

友所緘金在焉乃囑緘如故置其處終身不言 舊通志

黃梅劉珏年百二十一歲漸水陳觀峯有隱德壽百歲

妻周氏百有二歲俱載縣志

黃梅洪度精書法一日洪濤浮敝篋發之得宋僧道肯

集篆金剛經字久磨滅乃精思七晝夜重臨刻佈宗伯  
董元宰學士陳居一何象岡侯木庵釋以小楷摹勒上  
石藏燕京摩訶庵

舊通志

孝感黃在中好黃老爲羽士歲戊午二月壽百歲忽有  
黑兔至伏於堂右衆賓驚異在中曰我生年月日時俱  
邪屬兔也又三年乃卒

邑志

舉人胡基讀書白雉山中有僧大海持籃來見基下拜  
呼師兄云師授記若逢籃繫斷大治遇胡基今果斷也  
與居久之能知基意向及其家事皆豫以告夜坐墓間  
頗致天神及諸鬼物因謂基宜從我尋舊盟毋絆迷津  
苦海又負韋馱丐基莊嚴像重數百觔僧去來僅兩時

許後基於某庵見之則在數百里外也基欲爲作庵平  
等山僧曰此非吾地後二十年有海外高僧來主之見  
基無去意乃與期後會日時忽行不見至期基病甚遲  
僧不來竟以其時卒

舊通志

吳徹字文通江夏人雅善吟咏家貧落魄好奇節元末  
陳友諒置諸親密呼爲先生遣偵明太祖爲所獲釋其  
縛問曰汝能詩爲我賦天閑百馬圖徹應聲曰問渠何  
日渡江來百騎如雲疊鼓催九十九中皆汗血當頭一  
個是龍媒太祖擊節然憾其爲友諒用刺詭譎秀才四  
字於面遣還友諒醜之徹掉小舟遁去後太祖攻武昌  
將屠之徹忽求見復命題西山夜雨詩應聲曰莫厭西

山夜雨多也應添起洞庭波東風肯與周郎便直上金陵奏凱歌太祖領之遂班師還建康後屢下詔物色之徹曰吾面目可憎竟辭不出

江夏志

夏忠靖仰山脞錄夏忠靖原吉先世德興人大父以官寓湖河遂家湘陰母夢三閭大夫入其室已而生原吉德量汪洋人莫測其際時同事有性褊急者嘗書吉姓於座右以自警少忘之性如舊嘆曰夏公真不可及也或問公量可學乎吉曰某幼時人有犯者未嘗不怒始忍於色中忍於心久則自熟殊不與人較何曾不自學來又曰處有事當如無事處大事當如小事若先自張皇則中便無主矣及卒贈太師

夏熙廣濟人初爲掾給事縣庭好春秋學每就寓曹沂之夜分不輟令得其故驚愕給筆札試之曰不凡之器也牘薦爲諸生後以春秋入南雍舉永樂癸卯鄉試第一五名署諭安福卽以春秋傳授諸生稱名江右

舊通志

范理先進遺風楊文定溥執政時其子自鄉來省至京耶溥問曰一路守令聞孰賢其子曰道出江陵其令殊不賢曰云何曰卽待兒苟簡甚矣乃天台范理也溥默識之卽薦陞德安知府甚有惠政再擢爲貴州左布政或勸理當致書謝理曰宰相爲朝廷用人非私理也何謝爲逮溥卒乃祭而哭之以謝知己云

衡陽大耄衡民姜茂富者生於正統間至嘉靖二十八

年一百四歲矣郡守蔡汝楠召見之賚以粟帛題額旌  
日禮養高年司理舒化賜以杖銘曰履吉而康後二年  
乃卒 舊通志

劉餘慶江夏人景泰癸酉鄉試第一天順復辟特選二  
十八人入朝餘慶與焉其夜上夢二十八宿入見盡授  
御史 舊通志

李西涯東陽入閣年久當武宗朝不能諫正有投匿名  
詩云文章聲價斗山齊伴食中書日已西回首湘江春  
水綠鷓鴣啼罷子規啼末句諷以鳥語行不得也不如  
歸去後竟因詩告歸 舊通志

徐鉉與兄鉞同登弘治庚戌進士年僅弱冠使交趾烹

猩以獻鉉舉箸取兩日啖之交人憎服 舊通志

甯均黃州師巫正德間在飛喪崖見一鼠盤旋道上忽  
入地穴其下得銅印一鈕上篆扶蠶王印用署符呪能  
呼風雷後柄損遂不驗 舊通志

錢定黃陂人世宗在藩邸侍講讀一日忽問曰昨夢髮  
白作何兆定曰王上添白其吉可知世宗嘿喜及繼統  
徵至京授官不就乃賜金帛冠服親書御扇扁其門曰  
天下一人師 舊通志

呂禧黃岡人總角作烈女旨酒二賦奇字盈幅時人莫  
識也惟王太史稚欽見而奇之呼爲國器舉嘉靖辛卯  
鄉試除丹稜令楊太史用脩爲序共蜀稿 舊通志

唐時舉咸寧人父毓明經有子三獨器重舉分產罄與  
昆季謂舉曰汝不藉此也適有穀數鍾曝階下舉方負  
暄讀書爲羣豕食盡不顧妻怒投其書舉笑曰柰何爲  
五斗米棄我千鍾粟乎天下名義果非婦人所知也尋  
登嘉靖丁未進士

舊通志

彭信古字龍陽麻城人幼同季弟遵古從伯兄好古學  
皆嗜讀書而信古獨勇礪山有祟常魅人信古力叱之  
聲如山頽詰且往視則一白狼斃巖下然每試輒鈍及  
以已文予其弟仍擢首乃慨然廢書以武籍登進士而  
伯季皆第春官時人稱爲三陽以其字熙陽龍陽且陽  
也

舊通志

夏鼎字銘韋通判相儒子孝感人有異才爲諸生不第  
棄去中萬曆丙午武科尋以足疾杜門著述凡數十卷

尤精韻學

邑志

胡國棟字枳稜御史其俊子孝感人初名應振以明經  
當授司訓有請纓志遂棄去更名如龍中武科授河南  
汝州千總又以不合上官去更今名復成武進士授大  
河衛守備以疾卒棟力強貌偉弓矢劍擊無不絕倫嘗  
與人角技令承丸於頂挾彈背擊之百不失一羣盜畏  
其名無敢犯者

邑志

程之試黃岡人萬曆己酉鄉舉歷官開封同知理河務  
有濬築功河神舊祀金龍大王忽有詭稱黃大王者觸

之譴責立至羣肖像奉之總河命試往驗試以繩縲像  
頸拉仆之毀其廟而神不靈後以父春秋高乞歸舊通  
志

廣濟陳王化有孝行萬曆乙卯歲苦疫闔門俱困母卒  
不食三日夜感神謂曰吾憐子爲子斧驅疫旦起視斧  
入門寸許患者悉痊舊通志

孫煜天啟丁卯文學館於蘭溪歐氏忽有頭陀入齋云  
孫郎何久戀人間三山有辛草服之可以免劫宜偕吾  
去煜辭焉頭陀竟拽之走歐氏爭挽不得其行如飛久  
之惟見高巖幽澗古樹雜花如織煜思家大痛頭陀曰  
世緣未斷可瞑目勿視少頃已在黃郊柯山矣舊通志

中軍名上庸四川人懷宗十六年由武進士授上湖  
南兵巡道中軍值張獻忠寇至石磯站部卒烏散上庸  
大呼腋挾佛郎機擊賊殺數十人賊大至火藥盡猶舉  
鐵礮奮擊力竭死之後人於其死處每聞金鐵聲舊通  
志

梅啟南廣濟諸生懷宗辛巳歲大饑江北人相食啟南  
與陳伯順等議施賑夜夢天神謂曰人民大難施粥可  
濟啟南許施粥十日神微笑次夜復夢如故旦云事已  
聞諸上帝矣明日縣令議賑啟南輸穀助之舊通志

劉岱嶽沱川步民兄弟三人皆爲伍伯緝盜江湖懷宗  
時獲盜魁以賄重而縱之囊金歸設大籩條中堂几上


寘金滿內陳牲藝楮家人無小大盡歡忭忽遽條火起  
三人愕然退立金從火光中作紫蜺破屋瓦徑去無銷  
錄存者 舊通志

馬炳然正統間宰嘉魚羣盜劫藏去而欽召報適至以  
盜不得阻行始盜入馬於暗處稽其數三十人有長而  
髯者魁也因密屬捕者懸賞罰期必得會陽邏鎮渡江  
人數及一髯人正如盜狀遂縛以聞虐訊皆誣服馬始  
就道後豫章獲盜稱贓出嘉魚移文楚臬守以是罷囚  
皆死厲獄中正德間馬建中丞節過楚入閩楚正戒嚴  
以劇盜劉六劉七等且至馬與楚藩臬爭禮出遇盜傷  
邏磔其屍捨其處子家屬死者三十人人謂冤報時鄰

余貴不忍大臣女辱賊卽橐千金具牒屬青衿方  
等往贖女追及於潯江其帥趙風子受金還女曰以克  
爾郡犒軍錢厚貽而遣之余具車馬以四老嫗護女送  
還蜀郡 黃岡志

渠油黃州渠生貨油為業人呼曰渠油每作油乘爇益  
便溺幾三之一因是獲息頗博其子忽告母曰爺身畔  
常有獄子把柳棒隨後他人無所睹父固莫信又曰我  
將死母亦不免未幾子母繼亡渠遂感疾如受考掠狀  
家貲索然經歲而殞 舊通志

閭邱十五黃岡村民富積米穀每幸凶年卽閉廩騰價  
細民苦之既老且病不復能飲食獨食羊矢家人憐痛





刻木爲模置粉餌如羊矢狀使食之入手卽投於地須  
車矢乃肯咽之歷數月方死舊通志

屈姊離騷注女嬃屈原姊也楚人謂女曰嬃袁山松云

屈原有賢姊聞原放逐亦來歸喻令自寬全鄉人冀其

見從因名姊歸縣縣北有原故宅宅之東北有女嬃廟

擣衣石猶存

司馬徽妻別傳司馬徽有人倫鑒識時人有以人物問

徽者初不辨其高下每輒言佳其婦諫曰人質所疑君

宜辨論而一皆言佳豈人所以咨君之意乎徽曰如君

所言亦復佳

華容女干寶搜神記漢建安初華容有女子忽啼乎云

有大喪言語過差縣尹以爲妖繫獄百餘日忽於獄中

哭曰劉荊州今日死華容去州數日卽遣馬吏驗視表

杲死縣乃出之續又歌吟曰不意李立爲貴人後無幾

曹操平荊州以涿李立字建賢爲荊州刺史

韓康伯母世說韓母殷隨孫繪之之衡陽於闔廬洲中

逢桓南郡卞鞠是其外甥時來問訊謂鞠曰我不死見

此豈二世作賊在衡陽數年繪之遇桓景直之難殷撫

尸哭曰汝父昔罷豫章徵書朝至夕發汝去郡邑數年

爲物不得動遂及於難夫復何言

木蘭明一統志黃陂縣木蘭山下有忠烈廟廟後有冢

相傳爲木蘭將軍蓋朱氏女代父西征者其說見於古

樂府然不著何代人獨詩中有可汗語知其世非晉卽  
隋唐也又文苑英華載木蘭歌注云郭茂倩樂府不知  
名葦元甫續附入其歌曰唧唧何力力木蘭當戶織不  
聞機杼聲唯聞女嘆息問女何所思問女何所憶女亦  
無所思女亦無所憶昨夜見軍帖可汗大點兵軍書十  
二卷卷卷有爺名阿爺無大兒木蘭無長兄願爲市鞍  
馬從此替爺征東市買駿馬西市買鞍韉南市買轡頭  
北市買長鞭旦辭爺娘去暮宿黃河邊不聞爺娘喚女  
聲但聞黃河水鳴濺濺旦辭黃河去暮至黑山頭不  
聞爺娘喚女聲但聞燕山胡騎鳴啾啾萬里赴戎機關  
山渡若飛朔氣傳金柝寒光照鐵衣將軍百戰死壯士

十年歸歸來見天子天子坐明堂策勳卅二轉賞賜百  
千強可汗欲與木蘭官不用尚書郎願得明駝千里足  
送兒還故鄉爺娘聞女來出郭相扶將阿姊聞妹來當  
戶理紅粧小弟聞姊來磨刀霍霍向猪羊開我東閣門  
坐我西閣床脫我戰時袍著我舊時裳當窗理雲髮挂  
鏡帖花黃出門看火伴火伴驚忙忙同行十二年不知  
木蘭是女郎雄兔脚撲朔雌兔眼迷離雙兔傍地走安  
能辨我是雄雌  
岐陽公主唐杜悰尚憲宗岐陽公主牧澧陽宏辭李宜  
古數陪宴飲戲謔侮慢悰不能容使辱之公主出而收  
之云尚書不念諸子學文待士如此那得平陽之譽遣

易衣而赴中坐岐陽請爲詩冀彌縫也宣古詩云紅燈  
初上月輪高照見堂前萬朵桃威策夜深拋耍令舞來  
按去使人勞悰賞之後悰二子裔體儒林相繼登第人  
謂非其母不能成其子也舊通志

鬻鹽媪鄂州李媪居南草市無子鬻鹽自給淳熙中市  
大火屋廬殆盡媪室獨存門外鹽兩席几所挂葦荐無  
少損郡守趙善俊詰之對曰無所長但每日所貨來買  
一斤以十八兩與之所憑以活歲年者一秤而已舊通  
志

營道婦營道縣村婦養姑二十年孝謹姑因食婦所進  
肉而死鄰人有小憾訴其置毒縣牒尉薛大圭往驗婦

不能解願卽死薛疑之反復扣質婦曰每得肉魚宜厨  
中柱穴薛詣其居視柱旁之蜈蚣無數集其中具以白

縣乃釋舊通志

充婦阿毛熙寧丙辰四月二十六日襄州通衢一死婦  
阿毛其夫楊金配隸房陵旣死詣州請陳願負夫骨歸  
葬故鄉遭時大疫遂斃於道舊通志

秦氏衡陽少婦秦氏孀居有姿姑欲嫁之不聽鄰惡少  
馮小二欲挑之以姑在不得聞因計毒其姑佯爲助喪  
求與婦合婦怒擲石中之因計婦有新私爲姑所禁置  
鳩焉陷於辟有鄞人管思易者以恤劑至疑之夜夢老  
婦牽二馬泣訴曰馬實殺我徧求馬姓者不得視鄰右

為馮小二忽悟遽呼訊之立承婦得釋舊通志

韓希孟南山墨談韓嫁為賈尚書子瓊婦元兵破岳州

韓被掠以衣帛書一詩自投於江而死長興州判官沈

思安嘗託劉元履者丐趙松雪為書其詩元履諾而未

言一夕夢一婦人云趣為我求書庶因大人君子之筆

發攄幽憤松雪聞而異之乃為之寫一通歸之於沈

雷母高世泰雷母傳石首王珠琦丁元末紅巾之亂家

族盡罹賊禍孑然一身奔走於鼎澧之間逐獵為生獲

一田犬一頭九耳奇而畜之每出獵一耳動則獲禽獸

一倍兩耳動則獲禽獸二倍三耳四耳動則所獲如動

數五六七八耳動者所獲盈庖無算至九耳齊動則逐

獸歷年從未一見俄一日九耳皆動心竊喜遂馳入山

竟日無所獲悵然而返經石塢犬徑奔其中見一石大

如斗為之廻環狂吠尾爪搔搔起伏僕僕始則石上蘇

苔搔之成痕久之爪跡深沒石中琦謂必奇珍負歸置

神几間一夕風雨疾作迅雷入室破其石一乳女在中

呱呱而泣始以為不祥欲棄之又不敢棄也鄉里觀者

如堵遂聞之官官知為神物合哺之言笑飲食無異尋

常家處子鄰人以其怪異莫肯與之議婚及笄琦遂配

焉字曰雷氏温惠淑慎賢德內助若素嫻於師氏之訓

者後生子三俱鄉薦孫四俱登甲第至今屢葉相傳孫

子繩繩號為雷母其九世孫敬軒憶祖詩曰禍慘紅巾

十八門春風何意有兒孫  
灃陽奔命吾高祖  
奇構當年裕後昆

鄂州民謠宋史開禧二年鄂州民謠塞上將軍少城南  
從事多宣威不可問  
恢復竟如何時權臣開邊鄂爲宣  
撫使置司多辟親故幕賓聚城南爲酣縱云

紅巾賊元至正間羅田徐壽輝與麻城鄒普勝等倡妖  
術聚衆反以紅巾爲號黃州志

歐普祥黃岡人歲辛卯從徐壽輝以燒香起兵爲元帥  
稱爲歐道人壬辰二月引兵掠江西諸郡縣攻袁州焚  
室廬掠人民以去仍遣別將守之既而分宜人彭繼凱  
與元帥別速堅同起義兵復袁州普祥怒團結營寨癸

巳二月復攻袁州速堅與萬戶寶同等堅守城中民困  
食盡死者相枕藉十二月城陷普祥遂據之分兵陷吉  
之安福瑞之高安諸縣與元兵屢戰獲勝壽輝加普祥  
左丞大司徒袁國公庚子歲陳友諒殺壽輝徵兵於普  
祥不應壬寅明師克江西普祥令其子文廣納款歸附  
厚賜之命普祥仍以本部軍馬守袁州舊通志

蘄州盜徐正先是瀏陽有彭和尚能爲偈頌勸人常念  
佛遇夜燃大炬名香念偈拜禮愚民信之其徒遂衆徐  
本湖南人姿狀龐厚無他長生平以販布爲業往來蘄  
黃間時遇彭衆欲爲亂思得其主一日徐於鹽塘水浴  
衆見其身上毫光起皆驚異之遂立爲帝以蘄春反天

下響應東南遂大亂湖廣江西浙江三省城池多陷沒  
開蓮臺省於蕪春然資性寬縱權在羣下擁空名耳後  
其臣僞漢陳友諒率兵攻臺謀奪位遂死采石舊通志  
倪文俊號蠻子聚衆爲亂倪世業漁居黃陂其生之夕  
母夢有白虎入室及徐壽輝僭號倪爲僞相每戰克捷  
所至殺害無厭又據荆鄂潭岳黃蘄澧安陸常德寶慶  
等處然驕恣不愛下竟爲下所殺前二夕母復夢白虎  
死遂遇害舊通志

陳友諒沔陽人本姓謝祖干一贅於陳遂冒其姓父普  
才黃蓬漁子也友諒膂力過人嫻於武藝嘗爲縣吏不  
樂會羅田徐壽輝與倪文俊兵起慨然往從之爲文俊

簿書掾尋亦統兵爲元帥襲殺文俊遂并其軍自稱平  
章至元戊戌陷安慶龍興瑞州等路徐壽輝聞其破龍  
興欲徙都之友諒不從壽輝引兵發漢陽下江州友諒  
陽出迎伏兵於城西盡殺壽輝部曲遂自稱漢王立王  
府置官屬庚子五月犯龍江明太祖擊破之還至采石  
弑其主壽輝稱帝國號漢改元大義尋遣其將張定邊  
陷安慶明太祖帥舟師討之大破友諒軍友諒奔武昌  
久之憤其疆場日蹙乃作大艦載家屬空國而行兵號  
六十萬攻洪都明太祖親總舟師來援戰於彭蠡屢破  
友諒友諒窮感欲由禁江口奔武昌明兵復邀擊之友  
諒中流矢貫睛及顛而死友諒自稱帝至死僅四年

四十僞帥張定邊乘夜以小舟載友諒屍及其子理徑趨武昌復立理爲帝改元德壽明兵至理降之江夏志熊天瑞荊州人初以樂工乘亂聚兵從徐壽輝攻掠江湘間後以陳友諒命陷臨江吉安至贛州凡四閱月下其城友諒以其有功加參政俾守贛州兼統吉安南韶諸郡辛卯友諒攻江西檄天瑞以兵來援不應及友諒敗死乃佯遣其子元震赴援已而與龍泉彭時申爭萬安地以兵相攻又欲圖取廣東預於南雄造戰艦甲辰春率兵數萬進攻廣州忽天晝大雨如注雷震其檣舟不能進天瑞驚懼仰天祝曰若廣州非予有則天爲霽明當卽日還師祝已天果霽旣歸贛望氣者言將有外

兵至可厭之天瑞不信是年夏以兵攻湖南桂陽山寨皆俘獲以歸明師旣渡江天瑞始懼遣元震築壘太壺所爲備禦計秋九月明師至贛天瑞閉城拒守常遇春鄧愈浚濠立柵以困之凡五閱月援絕糧盡乃肉袒詣降盡獻其地

荊州志

劉千斤不知何許人成化初與石和尚李鬍子後先嘯聚鄖西靖勇將軍朱永兵部尚書白圭奏至詔官軍攻擊大敗之嗣是流民復聚荆襄綿亘千里爲梗詔命都御史原傑籌之傑晨夕馳至三省延問逋民皆願附籍爲良疏請從之給田安集於荆襄德鄖四府得男婦八萬五千人遂陞鄖縣爲府曰鄖陽統治之立行都司領

一衛三所薦文武守臣布列分理舊通志

龔福全不知何許人正德初嘯聚榔桂丁丑春詔三省夾擊之都御史秦金率兵破其寨柵九十擒福全斬其偽總兵劉福興李仁才俘者三千人舊通志

劉六劉七正德四年五月劉六劉七趙風子取道至團風鎮奪舟入江殺戮甚衆黃州志

龍求兒辰州嗜爾山苗與龍母叟龍子賢同姓爲姻嘉靖間求兒僭稱苗王南結貴州土獠西誘酉陽諸蠻詔討之起都御史萬鏗會湖貴撫臣撫勦乃率永順保靖官兵攻克嗜爾諸山斬級七百七十有奇俘三百有奇辰沅悉平議增官兵控制之舊通志


徐景榮嘉靖二十四年春正月楚世子英耀上弑楚王顯榕先是英耀上烝宮婢通妓女楚王懲以法英耀慚恚遂與武昌護衛軍餘徐景榮等二十六人歃血爲盟謀弑楚王以舉炮揚聲揮手爲號執瓜鞭尸長史孫立貪賄與承奉王憲張慶朦朧掩飾巡撫都御史車純巡按御史伊敏生具奏詔會勘英耀斬首西市仍焚棄徐景榮孫立王憲張慶皆論死江夏志

明末寇亂懷宗八年正月有賊數萬寇黃安焚殺甚慘二月初四日賊首曹操闖場天入大王等率衆萬餘陷羅田知縣梁志仁典史單思仁教諭吳鳳來訓導盧大受死之志仁妻唐氏亦不屈死九月寇廣濟敗鎮筸兵



遂大肆焚殺知縣黃弘會走匿 十年經畧熊文燦總  
兵左良玉招撫張獻忠一丈青等賊於蘄州荆藩為之  
置宴邸中時良玉不主撫議後果有穀城之叛 十五  
年七月初三日賊革裡眼率眾萬餘襲黃安破之十二  
月二十三日賊張獻忠陷黃梅墮其城 十六年正月  
二十日賊革裡眼復入黃安二十二日陷黃陂傷邑令  
趙元有縣丞夏統春主簿薛聞禮皆不屈死之賊設立  
偽官去士民殺之賊怒復至墮其城是月二十六日蘄  
州鎮守兵通賊張獻忠乘夜雪襲城破之殺戮宗室紳  
衿居民殆盡驅婦女毀拆城垣頓為平地時各營兵俱  
與賊通鎮守兵及所弁張國威俱叛入賊營江防道許

士奇被執去死於麻城三月初五日獻忠襲蘄水破之  
焚戮殆盡復驅丁男婦女墮其城 十六年三月十三  
日遂自蘄水襲破黃州殺戮不可勝計時雨後血流有  
聲設机於清淮門外斷書生掌且剽之擇婦如手足纖  
小者專使平城挺刃交加生理紅粉不日而崇墉蕩然  
四月初六日麻城叛首明承祖洪佑兒迎賊獻忠入其  
城佑兒李冢宰豎也勇悍桀驁因亂號召諸逆僕起洗  
耳會焚殺主人旬日衆至數千據邑叛至是席捲從賊  
號新營賊併其衆勢益張無何陷省城新營導之也然  
承祖等寃為獻忠所殺四月二十三日獻忠復入黃州  
以上 州志 十二三年間流賊混十萬過天堽滿天星八大



王混天星老狃闖場天曹操革裡眼等掠郢東焦山  
溫峽口一帶彼時因陵寢所在四方援兵雲集有秦夫  
人阮夫人皆土司女官統猓猓兵若干以象十餘隻爲  
前驅又施州衛月空和尚統僧兵若干又總兵猛如虎  
與劉孫二璫統京營銳卒若干賀李二家兵若干接踵  
而至約兵十數萬糜餉需求蹂躪地方尤甚於賊一聞  
賊至龍泉寺皆魚鳥散去十三年督師楊嗣昌困獻賊  
於川之巫峽人馬將盡旦夕受縛獻忠拚死潰圍止三  
十七騎嗣昌急檄郢鍾錢中選伏兵於荆門要害截殲  
之中選畏縮不敢進賄王璫以陵寢爲辭賊假裝督師  
差官給破襄陽戮襄王殺掠幾盡勢復猖獗不可制嗣

昌聞報自縊死 鍾祥志

鄂城之陷懷宗十六年春左帥移師東下掠兩岸船幾  
盡止於九江夏五月晦日賊張獻忠陷會城先是獻賊  
爲督師楊嗣昌困於瑪瑙山僅以數十騎逸去紿破襄  
陽其衆不滿千人乃遁於六安山中踰年始出陷蘄州  
蘄水繼陷黃州益以麻城里人叛黨洪明諸逆及黃屬  
新附之衆合數萬人其勢益張漸有飲江之志密遣姦  
謀徧布城中而楚藩所募護衛新兵弁領張以敬者黃  
同諸生也嘗犯教楚藩督過之因潛與賊通約爲內應  
獻賊遂從樊口涉江西上故相賀逢聖聞之親啟楚藩  
請發錕鎗士卒議守禦楚藩不以爲虞監軍王揚基適

奉巡撫江北之命聞寇逼欲去逢聖涕泣挽之不得二  
十八日遽揚帆西渡防守鎗筭兵亦跳走人心洶洶前  
三日有發以敬等通賊逆謀者馮生雲路以告逢聖逢  
聖不決密問北撫大笑斥爲狂生於是以敬等懼誅謀  
益急時賊欲徘徊馬橋而城人速之故宵馳二十九日  
突至攻大東門及翼日未刻大雷雨城上人不能仰視  
有寒而仆者雨止各巷口有白衣一二人呼曰賊已從  
某門入矣守者內顧賊登其瑕遂不守賊入大肆焚殺  
踞王宮以竹堦昇楚藩華燧浮之江逢聖聞變入告夫  
人危氏先自盡乃投滋陽橋下以死同時致命者有長  
史徐學顏諸生馮雲路明睿汪堃延朱華趙等而明睿

一門爲最烈其餘抗節於兵鋒水火名湮沒而無稽者  
難悉數也賊凡大殺城中三晝夜乃封刃驅男婦百萬  
閉於上下兩壇時方暘饑渴已不欲生旋傳令挺而擠  
之江浮尸千里相屬水爲腥臙不可汲者累日而楚宗  
之幸脫者賊皆懸賞購捕及爲怨家所擒獻剪薙尤無  
遺焉賊乃僭稱西王改武昌爲天授府江夏爲上江縣  
設僞官以李時榮爲僞巡撫舉人謝鳳洲爲僞天授府  
知府未幾時榮死鳳洲代之並設僞科取士然獻忠每  
登王座卽頭眩又性猥燥常跳擲調弄弓刀不能頃刻  
息其殘忍禍賊亦有由然也久之左帥乃遣將方國安  
等恢復賊遂取楚藩金寶掠遺民男女泝江上岳陽長

沙等府已而入蜀左帥始至以功封寧南伯尋進封侯開藩鎮楚將佐佩總兵印者累累而江北諸城郭半爲李自成有不能取也相傳良玉以敗襄城戴罪立功故以鄂城委賊而後收之當賊陷鄂時密以楚府藏鏹數舟遺左又傳前此左之駐鄂也楚人疾之不得已去亦怨楚人有不日城破之語以鄂委賊之二說者必有一焉

武昌府志

郢城之陷懷宗壬午十二月廿六日賊衆數十萬於鍾祥石牌作浮梁渡兵廿七夜風大作船盡碎次日復成之三十日平明偪郢城惟援勦總兵貴州溫如珍先日方至立營未定力戰不勝死傷者衆率麾下數百人衝

陣而去癸未元旦賊分兵破夔總兵錢中選巡按李振聲欽天監博士楊永裕俱爲賊擒五營將卒或殺或降者亡算已時陷城撫軍宋一鶴畱守沈壽崇邑令蕭漢巡按中軍李佳應死之守備王璫知府王玘降賊守道張鳳翥通判張國運越城潛逸闖賊李自成僞稱奉天倡義文武大元帥羅汝才亦稱僞元帥諸賊目武則有僞權制果威都尉掌旅部總哨總等各文則有僞政府侍郎從事防禦府尹州牧縣尹等名改承天府爲揚武州

鍾祥志

漢陽寇變壬午冬闖賊李自成決黃河水灌開封乘勝南下寧南侯左良玉敗走癸未四月十六日賊遣其黨

白旺由德安突至漢陽官民間風宵遁賊駐三日拔營去五月二十九日獻賊陷會城漢陽又為獻賊所據設偽官以沈會霖為知府燕厥中為漢陽縣知縣會霖孝感人先時陷賊彌歲以計得出壬午領鄉薦與賊謀臣潘獨鰲有舊獨鰲潛來致賀事洩言於當事斃之城破會霖有老母不及遠避賊質其母使守漢陽會霖與同年丁之鴻謀又以計脫其母去厥中邑無賴子也率先迎賊得授偽職倚賊勢以恫喝不如意者會霖去賊更命彭永觀來厥中益無忌邑人受其荼毒九月監軍道章曠同貢生鄭古愛泣請左良玉遣總兵方國安恢復武漢賊遁岳陽獲偽官彭永觀彭永侗燕厥中廿六帝

仲瑛等誅之乙酉左良玉稱兵東下部將惠登相張星璧駐漢陽亦焚掠而去餘賊復陷漢陽漢川其時既無統帥惟肆殘戮幸

王師追勦賊始解散五月總督佟養和鎮武昌下令安輯民遂復業

左兵之變左帥屢與闖帥白旺戰潰沔沔間不勝其子夢庚有他意乃以誅馬士英為名反於武昌縱兵沿江大掠而東左帥不能制行至九江恚死

武昌府志

洞庭湖石刻宋類苑往年有人於洞庭湖中得一石刻詩云鮫室團青草龍堆隱白沙護江蟠古木迎棹舞神鴉破浪南風正收帆畏日斜雲山千古疊底處上仙槎

或持問諸作者云此老杜詩也近有管城士大夫家藏唐本題杜美一卷皆子美詩其中一首云惠二還東溪因至一送惠子白驢瘦歸期惟病身黃天無老眼空谷滯斯人岸蜜松花熟山杯竹葉春柴門了無事黃綺未稱臣今子美集中所無

杜甫和詩唐詞客李節過來江吊子美詩云耒陽浦口繫扁舟紅蓼洲頭宿白鷗半夜青燈千里客數聲寒雁一天秋蛩吟隔岸情如訴斗柄橫江勢若流惆悵社陵老詩伯斷碑古木遶荒邱焚之祠前是夜夢子美於沙隄和詩有若遇故鄉王永日便將清泪灑荒邱之句王永日子美故人也衡州志

裴廸詩竟陵縣西塔寺有陸羽茶泉裴廸詩云竟陵西塔寺蹤跡尚空虛不獨支公在曾經陸羽居草堂荒產蛤茶井冷生魚一汲清泠水高風味有餘廸與王維同時其詩自輞川倡和外無傳此詩安陸府志

衡山詩樵南岳志衡山五峯下有樵夫能詩嘗有廣州幕府夜聞舟中吟曰野鶴灘前一棹孤月光遙接洞庭湖堪憎迴雁峯頭過望斷家山一字無問之乃樵夫所自作也

蠻語世說郝隆爲桓溫南蠻參軍三月三日曾作詩云  
蝦蛄躍清池桓問蝦蛄是何物答曰蠻名魚爲蝦蛄桓曰作詩何以作蠻語隆曰千里投公始得蠻府參軍那

得不作蠻語也

荆州記盛弘之荆州記載鹿門事云龐德公居漢之陰  
司馬德操宅州之陽望衡對宇歡情自接泛舟褰裳率  
爾休暢記沮水幽勝云稠木傍生凌空交合危樓傾岳  
恒有落勢風泉傳響於青林之下巖猿流聲於白雲之  
上遊者嘗若目不周玩情不給賞若此二段讀之使人  
神遊入極信奇筆也記三峽水急云朝發白帝暮宿江  
陵凡一千二百餘里雖飛雲迅鳥不能過也李太白詩  
朝辭白帝彩雲間千里江陵一日還杜子美云朝發白  
帝暮江陵皆用盛弘之語也

鶴南飛曲蘇文忠集元符三年十二月十九日東坡生

日置酒赤壁下酒酣笛聲起江上使人問之卽進士李  
委聞坡生日作鶴南飛曲以獻奏曲嘹唳有穿雲裂石  
之聲

何潘著名唐何晦據言何洎爲瀟湘賦天下傳之同時  
潘緯以古鏡詩著名或曰潘緯十年吟古鏡何洎一夕

賦瀟湘

岳陽樓詩楊慎丹鉛錄余昔過岳陽樓見一詩云樓上  
元龍氣不除湖中范蠡意何如西風萬壑一黃鵠秋水  
半江雙白魚鼓瑟至今悲二女沉沙何處弔三閭朗吟  
仙子無人識騎鶴吹簫上碧虛乃視其姓名則元人張  
翔字雄飛作不知何地人也

雙忠詩葉忠節映樞過湯陰謁鄂王廟題詩云百戰英  
雄骨東窻笑語中編楚息未嘗丸蠟間先通鐵像行人  
磔王封史筆公我來瞻廟貌灑淚拜孤忠蓋報國丹心  
已見於此矣詩刻忠節祠中後武昌糧道王承烈次韻  
云山斗欽山斗流連語句中貞魂辭已現碧血此先通  
今古惟吾道乾坤此數公時雍私後起俯仰感雙忠採  
補

衣帶詩明季沅陵縣城南杜女名小英被流賊擄至小  
孤山投水死逆流而上直至洞庭有詩十絕繫於衣帶  
今傳二首云當年畫閣惜如珍何事率衣入水濱寄語  
雙親休睠戀入江猶是女兒身生平負節欲畱題身入

狂瀾數不齊河伯有心憐薄命東流直送洞庭西沅陵  
志



湖廣通志卷之一百二十

湖廣通志卷之一百二十

三

